

LABURRERAN

Eusko Legebiltzarreko Mahaiak Enrique Villarri ohartarazpen bat bidaltzea onartu du

Enrique Villar Espainiako Gobernuak EAEn duen ordezkariari ohartarazpen bat bidaltzea onartu zuen atzo Eusko Legebiltzarreko Mahaiak. Proposamenak EAJ, EA eta EB-IUren aldeko botoak jaso zituen. PSE-EE abstenitu egin zen eta PP aurka azaldu zen. Legebiltzarrean istilu gehiago eragiten baditu «neurri gogorrak» hartuko dituela jakinarazi zion Villarri. Eduardo Manzísidor Eusko Legebiltzarreko letratuari bere «nagusiaren esku-makila» izatea egotzi zion Villarrek, Legebiltzarreko kafetegian, informe juridiko bat zela medio. Juan Maria Atutxa Legebiltzarreko presidentearen ustez, Villarren jarrera «giza eta politikoki ez da bidezkoa». Esan zuenez, haren jarrera ez da «egokia» izan, «eta istiluak eragin ditu askotan Legebiltzarreko agintariekin eta gonbidatuekin».

Senaturako EAEko taldea eratu du PPK, EAJren ekimenei erantzuna emateko

PPk Senaturako EAEko taldea eratu zuen atzo Bilbon. Bere asmoa, EAJk Senatuan aurkeztuko dituen ekimenei erantzuna ematea eta «EAEko interesak defenditzeko ahots propioa» izatea da. Taldearen bozeramailea Jose Manuel Barquero izango da, bere ondokoa Gonzalo Quiroga, eta idazkaria Antolin Sanz. Lehen jardura otsailaren 5, 6 eta 7ko batzarrean izango du, eta Espainiako Konstituzioa eta EAEko Estatutua defendituko ditu.

Autonomiek European parte hartzeko aukera izan dezatela eskatu dio Ortuondok Aznarri

Josu Ortuondo EAJko eurodiputatuak eskaera bat egin zion atzo Jose Maria Aznar Espainiako gobernu-buruari. Alegia, autonomia erkidegoek Europako Batasuneko erabakiguneetan parte hartzeko aukera izan dezaten. EBko Presidentzia Espainiaren esku dagoela aprobetxatuz egin dio eskaera Aznarri. Ortuondok gogoratu zuenez, aurreko seihilekoan, Belgikak Presidentzia izan zuenean, bertako erregioek EBko bilere-tan parte hartu zuten.

Galindoren kontrako epaiaz Auzitegi Gorenetik ez dutela idatzirik jaso dio Defentsa Ministerioak

Defentsa Ministerioak ukatu egin zuen atzo, Enrique Rodriguez Galindo Guardia Zibileko general ohiaren kontrako epaia betetzeko eskatuz, Auzitegi Gorenaren agindurik jaso duenik. *Lasa eta Zabala* auzia-gatik zigortu zuen Auzitegi Nazionalak Galindo ehun urteko espetxe zigorrera. Gerora, Auzitegi Gorenak, gainera, kargugabetu egin zuen. *El Mundo* egunkariak atzo argitaratu zuenez, Defentsak idatzi bat helarazi zion Auzitegi Gorenari galdetuz ea bere epaia bete behar duen edo ez. Informazio horren arabera, Gorenak beste agiri bat bidali zuen Ministeriora Galindoren inhabilitazioa bete dezala eskatuz. Gainera, *Kale Gorri* aldizkariaren arabera, Galindok hilerio 3.000 euro jasotzen ditu Estatuaren ordainsari gisa.

San Sebastian egunean Donostiako udaletxean ikurrina jartzeko eskatu dio EAJ-EAko Elorzari

Odon Elorza Donostiako alkateari, San Sebastian Egunearen hasieran, ikurrina Donostiako banderaren ondoan jar dezala eskatu dio EAJ-EAko udal taldeak. Ikurrina legeztatu zela 25 urte betetzen direlako egin du eskaera hori EAJ-EAk. Enrique Aranak gogorazi duenez, 1977ko urtarrilaren 19an Udalak erabaki zuen ikurrina festaren hasieran igotzea; lau hilabete lehenago legeztatu zuten ikurrina, hain zuzen.

Zuberoako Batasunak argitasunak eman dizkie bertako kontseilari nagusiei

Zuberoako Batasuneko kide Jojo Malharin eta Aintzina Mazustak gutuna bidali zieten Jean-Pierre Mirande eta Michel Arhancet kontseilari nagusiei, eta Battitta Queheille Zuberoako herrien elkargoko lehendakariari. Zuberoaren aldeko diru bilketa ez dela «Batasunaren inizatiba izan, baizik eta Udalbiltzarena», diote. Hirurek gaitzetsi zuten Batasuna. Haiekin biltezeko prest daudela esan diete Batasuneko kideek.

ESTRADIZIOA. Batasunak eta Askatasunak erabakia salatu dute

Jokin Zubieta estraditatu egin dute Espainiara, eta kartzelan sartu

Aurten Frantziak estraditatzen duen lehen euskal herritarra da

Erredakzioa | IRUÑEA

Jokin Zubieta Valencia preso Espainiara estraditatu zuen atzo Frantziak. Zubieta eguerdian iritsi zen Madrilgo Barajas-ko aireportura. Auzitegi Nazionalako epaile Ismael Morenok espetxeratzeko agindu zuen.

Jokin Zubieta nafarra aurten Frantziak estraditatzen duen lehen euskal preso da. ETAko kide izateaz akusatuta, sei urteko espetxe zigorra bete du Frantzian. Atzo Barajas aireportutik Auzitegi Nazionalera eramane zuten. Ismael Moreno guardiako instrukzio epailearen aurretik pasa ondoren, hark espetxeratzeko agindu zuen. Zubieta ez zuen deklaratu.

Zubietari leporatzen diote ETAko *Nafarroa* komandoko kide izatea, eta Iruñeko Trafiko Zuzendaritzaren aurka 1993ko urriaren 29an egin sabotaiaren parte hartu izana. Auzitegi Nazionalaren arabera, Zubietak, ustez, aipatu Trafiko Zuzendaritzan 10 kiloko lehergailua jarri zuen, Iñaki Casas Carton eta Sebastian Prieto Juradorekin batera. Gertakariaren ikerketa Auzitegi Nazionalako 3. Instrukzio Epaitegiak darama.

Frantziak aipatu gertaerok aintzat hartuz estraditatu badu ere, 5. Instrukzio Epaitegian beste prozesu bat du zabalik. Gazte nafarrari leporatzen zaio talde armatuarekin kolaborazioa, armak gordetzea eta armak izatea.

Batasunak eta Askatasunak Zubietaren estradizioa salatu dute. Bi taldeon irudiko «Euskal Herriaren sufrimenduaren bizkar merkataritza politiko-ekonomikoa» egiten ari dira Fran-



Jokin Zubieta, eskuburdinak lotuta, atzo, Barajas-ko aireportuan.

tzia eta Espainia. Bestalde, Zubietaren ikaskideek kontzentrazioa deitu dute gaur 12:00etan. Donostian, Ibaetako campusean estradizioa salatuko dute.

Arizkurenen deklarazioa bertan behera utzi dute

Ismael Moreno epaileak Jose-txo Arizkuren presoaren deklarazio saioa bertan behera utzi

zuen atzo, defentsak argudiatu ondoren defentsarako eskubidea urratu dela.

Frantziak aldi baterako utzi zuen Arizkuren Espainiaren esku: lau hilabetez. Defentsak argudiatu du presoari leporatzen zaionaren berri jakinaraztean, haren defentsa eskubidea urratzen dela. Horrek prozesuaren baliogabetzea ekar lezake.

Asteasuko Udala

ESKULTURA BAT EGITEKO IDEIEN LEHIAKETA

Asteasuko udalak herri sarreran errotunda bat egin behar du eta bertan eskultura bat jartzea pentsatu du. Zein eskultura jarri aukeratzeko ideien lehiaketa martxan jartzen du.

- * Proposamenak aurkezteko epea: urtarrilak 16tik urtarrilak 31 arte.
- * Proposamenak aurkezteko tokia: Udal bulegoak.
- * Saria: eskultura egiteko enkargua.

Informazio gehiago: Asteasuko udaleko udal bulegoetan astelehenetik ostiralera 9etatik 13 arte.

Asteasun, 2002ko urtarrilaren 14an. ALKATEAK.
Sin.: Iñaki Amenabar Aramburu.

ZARAUZKO UDALA

LIZITAZIO-IRAGARKIA

2002ko urtarrilaren 14ko GAO, zk. 8, argitara eman da ondorengo lehiaketa irekia eta arruntako tramitazio deialdia.

XEDEA: Zarauzko Abendaño sektoreko 32 lurzatiaren erabilera pribatiborako administrazio esleipena, ekipamendurako eraikina eraiki eta ustiatzekoa.

EMAKIDAREN IRAUPENA: Gutxienez 30 urtekoa.
Gehienez 50 urtekoa.

ESLEIPENAREN KANONA: - Aurrenengo bi urtetan: ez dago ordainketarik.
- 3. urtetik 20.era, 108.182,18 € gutxienez.
- 21. urtetik esleipenaren bukaeraraino: 12.020,24 € gutxienez.

BEHIN BEHINEKO BERMEN: 2.337,94 €.

ESKAITZAK AURKEZTEKO EPEA ETA LEKUA: Idazkaritza Nagusian, 2002ko otsailaren 13ko eguerdiko ordubata arte.

AGIRIAK NON LORTU: Udaleko Idazkaritzan, astelehenetik ortiralerarte, 8etatik 3ak arte.
Tfn: 943 130960. Posta elektronikoa: zarautz@udal.gipuzkoa.net.

Zarauz, 2002ko urtarrilaren 14a. Alkatea. Sin.: Maite Etxaniz.